

Von de Kraniche unn von onnern Veeschel

Wie ich deetzt de Schorsch getroffe habb, hott der mir gleich ins Kreiz gehaache.

Au, habb ich gerufe, ei Schorsch, warum dusde dann mich haache?

De Schorsch hott gelacht: Du hosts verdient, Honnes.

Ei warum dann?, habb ischen gefroocht.

Der Kerl hott immer noch gelacht unn gesaat: Hotts weh gedue?

Naa, saach ich, ich war nor verschrocke. Awwer warum dann habb ischs verdient, von dir gehaache ze werrn? Habb ich derr uffs Fießje getrete?

Och Quatsch, sät de Schorsch, ich moon nor weilde vergesse host, im Oktower iwver die Kraniche mett merr ze redde, jetz sinnse all fort unn ich habb koon oonzische geseh. No ja, saach ich, aach wenn ich derrs gesaat hätt, häddsde aach kooner geseh.

De Schorsch hott e Schnut gezooge. Awwer isch hätt die Ohrn gespitzt. Host du dann Kraniche geseh odder geheert?

Ja, saach ich, omm Sunndaach vor verrzeh Daach, doo warn merr uffem Weesch zur Wart, uff oomol iss die Fraa stiehgebliwwe unn hott mettem Finger in die Luft gezeit. Horsch, hottse gesaat, Kraniche! Ich habb noch koo geheert gehabt unn habb hochguckt unn doo iss werklisch enn große Trupp kumme. Unn wie immer sinnse im Keil gefloche unn hawwe trompet was dess Zeich hält. Glaab merrs, Schorsch, wenn ich die fortmache seh kumme merr immer die Träne in die Aache, dess iss als det merr uffem Bohnsteich stieh unn det oons von de Kinner verabschiede, die irschendwohie in die Welt mache. Konn soi dass dess e bissi weit hergeholt iss, awwer so ähnlich iss dess, weil wenn die Kraniche uns verlosse, dann dauerts so long bis die widderkumme.

De Schorsch hott mich oogekuckt. Gell, du moonst dann immer, dess wär dess letzde Mol dassde die gesehe host, gebbs zu.

Ja, saach ich, doo hosde recht, du kennst mich joo long genuch. Awwer dann, wennse widderkumme im Friejohr, dann bin isch widder moosche owwe.

Honnes, sät doo de Schorsch, dess mett de Veeschel, dess konn oom schunn onns Herz gieh. Ich muss derr mol was verzähle, dess hott merr e gut Bekonnde deetzt verzählt unn doodebei hawwe aach dere die Träne in de Aache gestonne. Unn dess war so: Wie dere ihr Mudder so uff de Dot geleesche hott, doo hottse oft geflistert, dasse nooch emm Dot gonz gewiss enn Voochel werrn det.

Was dann fern Voochel?, habb ich gefroocht

Ja, dess isses joo, verzählt de Schorsch, die Fraa hott immer gesaat, sie det e Omsel werrn. Dess wär enn scheene Voochel unn der kennt so schee singe, ja, so e Omsel det se werrn wennse gestorwe iss.

Unn?, frooch isch.

Ja, sät de Schorsch unn hott aach e Tränche verdrickt, als die alt Fraa ihrn letzde Ademzuuch gemacht hott, hott uff de Fensterbonk von ihrm Sterwezimmer e Omsel gesotze unn hott in die Stubb geguckt. Unn dann isse fortgefloh unn moi Bekonnte moont, in dem Aacheblick wär aach die Seel von de Mudder fortgefloche. Unn vom nächsde Daach oo hott jeden Owend die Omsel im Boom vor der Stubb uffem große Zweich gesotze unn hott so schee gesunge, dass die Bekonnde gonz sicher war, dass doo drauße in de Omsel ihr Mudder widder in ihr Näh gekumme iss.

Ja, saach ich, dess iss e schee Geschicht, die muss ich merr merke.

Eiern Honnes